

Zeitschrift: Annalas da la Societad Retorumantscha
Herausgeber: Societad Retorumantscha
Band: 66 (1952)

Nachruf: Professor dr. Ramun Vieli
Autor: Durgiai, Erwin

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 02.04.2026

ETH-Bibliothek Zürich, E-Periodica, <https://www.e-periodica.ch>

Professor dr. Ramun Vieli †

«Mia mira: promover la pasch e l'unitad
denter ils romontschs!»

(Glaruna, ils 27 de schaner 1953, Ramun Vieli.)

Ual en quei mument, che las Annalas 1952 sepreparan per il viadi atras las valladas romontschas, va in stemprau sur nossa carezada patria grischuna e sdreina il cametg nunspetgau in pegn d'untgidas, che valeva per ina dellas pli fermas petgas della entira Retoromania: professor dr. Ramun Vieli sto suttacumber ad ina greva operaziun el spital cantonal a Glaruna e banduna avon temps ils ses cars e siu vast camp de lavur a pro della mumma romontscha. Tgei sorpresa per tut ils enconuschents ed amitgs digl aultpreziau defunct e tgei sperdita per igl entir moviment romontsch de nos dis, cun il qual il num Ramun Vieli vegn a restar ligiaus per adina!

Denter ils consterni contristai en malencurada secattan era las Annalas della Societad Retoromontscha. Sco vicepresidente e commember d'honor della Societad, sco commember della commissiun filologica per il Diczionari Romontsch Grischun e sco collaboratur digl annuari della Societad ei dr. Vieli staus onns en ed onns ora en stretgas e fritgeivlas relaziuns cun nossa la pli veglia organizaziun retoromontscha e siu organ. Ei descha perquei allas Annalas de prender il vel de malencurada avon che far la cuorsa atras nos vitgs e vischinadis muntognards. Quei sa denton daventar per oz mo cun questas paucas lingias de regurdienscha, la dueivla undrientscha dil grond romontsch vegn a suandar ella proxima annada.

Pilver, cun professor Ramun Vieli ei in dils pli gronds e meriteivels umens della renaschientscha romontscha ius vi tier la gronda armada. Ha el era deplorablamein contonschiu mo ina vegliadetgna de 58 onns, sche astgein nus bein constatar, che la secunda mesadad de sia veta seigi stada dedicata en moda excepziunala ed

exemplarica alla viarva ed alla cultura artada da nos vegls. Strusch in de nos menaders ha barhau e battiu per il beinstar spirtal e cultural de nies pievel retoromontsch ed ei la finala seunfrius per quei sublim ideal sco il car permiert. Il register suandont po marcar il rom de siu extendiu e nunstunclenteivel operar en honor della mumma romontscha.

Ils suverans vocabularis sursilvans, l'excellenta grammatica Nay/Vieli, ils prezios toms de «Nies Tschespet» ed «Igl Ischi» de sia era redaccionala dils organs della Romania, sias nundumbrevilas monografias e contribuziuns ella pressa ed en periodicas vegnan a restar per tschentanners monuments dil spért scientific digl erudit linguist e litterat romontsch. Mo era sia activitad el moviment romontsch sco cusseglader della Ligia Romontscha, sco vicepresidente della Societad Retoromontscha, sco commember dil comite della Cuminonza Radio Romontsch, sco viceparsura della Romania e vicepresidente dil Legat Cadonau en favur dil romontsch-sursilvan, sco representant della naziun retoromontscha ella Fundaziun Schiller ed ella suprastonza centrala della Societad svizzera per la radiodiffusiun, sco commember della commissiun cantonale per la nomenclatura e della commissiun per la biblioteca cantonale dat perdetga dell'impurtonza ed influenza de quella personalitad enteifer ed ordeifer nos confins. Senza exagerar ha perquei il president della Romania saviu predir en siu commuentont riug de bara, ch'ils romontschs vegnien aunc suenter generaziuns a plidar d'ina epoca Vieli. Quei astg' ins bein era dir a vesta de ses emiments success e merets per l'instrucziun e cultivaziun della giuventetgna romontscha alla scola cantonale, nua che dr. Vieli ha dociu cun premura e distincziun sco valent educatur varga in quart tschentaner. Daveras respectablas prestaziuns!

Schi gronds, ch'il car defunct po esser staus sco um della scienza ed exponent della quarta Svizzera, a ses contemporans, ses amitgs e ses enconuschents vegn el a restar ella memoria sco character ded aur e cavalier della gestadad e buontad. Sia fina demanonza, siu tact e sia toleranza eran pli che diplomazia, ei eran l'expressiun d'ina olma pura e d'in cor plein carezia proximala. Quella humanitad integra ed intacta fuva era la fontauna de sia ferma personalitad d'educatur e menader ed il misteri de siu success. Buca de sesmervegliar, ch'il comiau dal car defunct il di della

sepultura ei daventaus ina impressiononta manifestaziun ded attaschadadad ed engrazieivladad da vart digl entir pievel romontsch e che sia ovra e siu exempel vegnan aunc a resplender lunsch el futur secund sia davosa admoniziun paucs dis avon sia mort prematura: «Nus lein mai vegnir staunchels de promover la pasch ed unitad denter ils romontschs!» Questa sia davosa exhortaziun seigi per nus tuts sogn testament!

Dr. Ervin Durgiai.